

Cosoi naporinso'

Yosëri Cosoi camairinso'

1 ¹Moisësëso' Yosë piyapinën. Non hui'nin Cosoi itopisoso nipirinhüë', Moisësë catahuarin. Ina chiminpa-china, Yosëri Cosoi nontaton itapon: ²“Piyapinëhuë Moisësë itëramaso', nani chiminin. Ina chiminin ni'ton, quëmari ya'ipi israiro'sa Cortanii' ichipëntontaran. No'pa' quëtaranquëmaquë ya'conacamaso marë' napoarama'. ³Moisësë sha'huitërahuëso chachin nitaranquëma'. Insëquë huarësona pa'namaquë ya'ipi ina no'pa' quëtaranquëma'. ⁴Niquipi inotëro parti quëran no'pa' quëtaranquëmaso' caniaritarin. Nipano motopiro'sa partinta quëtaranquëma'. Iyopiratisii' pancaiquë huarë' quëtaranquëma'. Itiro'sa ya'ipi no'pa' mapiso' matarama'. Marë pancai' itopiquë huarë' hua'anëntarama'. ⁵Nanpisëinquën, co inso tëranta nani-tarinhuë' minsëinquënso'. Moisësë catahuarahuëso pochachin quëmanta catahuaranquën. Co naniantaranquënhuë'. Co pataranquënhuë'. ⁶Ama tël'huatonhuë', chiníquën cancantëquë'. Carinquën catahuaranquën inimicoro'sa minsëaran. Inapita minsërahuaton, no'panëna israiro'sa patomataran. Nani shimashonënapita quëta'huaso' sha'huitërahuë ni'ton, inapotaran. ⁷Napoaton ama tël'huatonhuë', chiníquën cancantëquë'. Piyapinëhuë Moisësë nani pënëninquëma'. Ya'ipi ina pënëntërinso' natëquë'. Ama manta ina naniantëquësohuë'. Ina pochin nipatan ya'ipi ma'pitaso ninanquë noya

pipitarinquën. ⁸Nani tahuëri pënëntërahuëso' quirica nontoco'. Naporahuaton noya natëancoso marë' tahuëri tashirë chachin ina yonquiráquë'. ⁹Carinquën camaiaranquën ama tël'huatonhuë', chiníquën cancantacaso marë'. Carinquën catahuaranquën. Insëquësona pa'patan ca'tanaranquën. Napoaton ama pa'yanquësohuë',” itërin Yosëri.

Canano'sa ahuëcaiso marë' noya niacopiso'

¹⁰Yosëri napotohuachina Cosoiso', Israiro hua'ano'sa camairin: ¹¹“Ya'ipi ya'huëarëhuataëchin pa'toco'. Pa'sa-huatoma israiro'sa camaico cosharo carahuaso', niina'. Cara tahuëri quëran Cortanii' pëntontarihua'. Siniro no'pa' quëtarinpoaquë, ya'conacaso marë' napoarihua'. Inaquë na'a inimicoro'sa ya'huëpirinahuë', Yosë catahuarinpoa ni'ton, minsëarihua'. Minsërahuatëhua', no'panëna matarihua’,” itërin.

¹²Nopino huënton, Caro huënton, Manasisi patoma huënton, inapitanta nontaton itapon:

¹³—Moisësëso' Siniro piyapinën. Ina camairinquëmaso', yonquico'. Siniroso Yosënënpoa ni'ton, noya ya'huëcamaso marë' no'pa' quëtarinquëma'. ¹⁴Ya'ipinquëma nito ahuëtëramasopita, ahuëtamarë ohuararamaso maco'. Sa'ama', hui'nama', inapitaso isëranchin quëparitapi. Pë'tahuanëmanta isëranchin quëparichin. Moisësë no'pa' quëtërinquëmaquë, quëparitapi. Canpitaso nipirinhüë', ya'natontatoma paco'. Quëmopinëma iscon huënton

patoma ya'huërinso', catahuamaso marë' paco'. Canaan no'paquë ya'huë-pisopita minsërahuatoma', no'panëna matamaso marë' inapoco'. ¹⁵Quëmopinëmanta Siniorori catahuapon. Canpita catahuarimaso pochachin inapitanta no'pa' quëtohuachina, sano cancantapi huachi. Nani inapitanta no'pa' hua'a-nëntohuachina', canpitanta ya'huë-ramaquë chachin huënantapoma'. No'panëmaquë ya'huëmiatamaso marë' huënantapoma', itërin.

¹⁶Napotohuachina inapitaso', Cosoi itapona':

—Ya'ipi camairancoisopita nisarai. Intohuaso paca'huaiso camaihuatancoi, inaquë pa'sarai. ¹⁷Moisësë camaihuachincoira natërai. Inapochachin quëmanta natërainquën. Isoíchin nohuantëraiso' sha'huichinquën: Sinioroso Yosënënpoa ni'ton, Moisësë ca'tanaton catahuarin. Inapochachin quëmanta ca'tanatëinquën catahuainquën. ¹⁸Insosona tëranta quëma camaitëranso co natëhuachinquënhuë', chimiin. Isoíchin nohuantërai quëma nicacaso': Ama të'huatonhuë', chiníquën cancantëquë', itopi.

Quirico ninano nëhuëcaiso marë' catoya'pi a'parinso'

2 ¹Israiro'saso', Sitin itopiso' ro'tëquë ya'huëantarapi. Ina quëran Cosoiso' catoya'pi nëhuëtacaiso marë' a'parin. Co'huara pa'shátërasoihuë' itapon: “Po'oana quëran Canaan parti paatoma ni'contaco'. Inaquë pa'sahuatoma Quirico ninano noya ni'co'. Nani ni'sahuatoma', sha'huitimaco,” itërin. Napotohuachina, pa'pi. Pa'sápatona Quirico ninanoquë canconpi. Inaquë a'nara monshihuantë sanapi ya'huërin.

Inaso', Nacapa itopi. Ina pëinënquë cansahuatona', huë'ëpatacaiso marë' quëparitopi. ²Napoaponahuë', a'na ya'huëhuani quënanahuaton, Quirico copirno sha'huitoonin:

—Cato Israiro quëmapi'sa ya'huërehuaso', nëhuëcaiso marë' huë'pi, itërin.

³Napotohuachina, Nacapa natanacaiso marë' sontaro'sa a'parin. Inapitaso' cantonahuatona natanpi:

—Cato quëmapi'sa huë'ëpaiarinën, topi natantërai. Inahuaso nëhuëtona'piro'sa ni'ton, ocoiquë quëpa'i, itopi.

⁴Napotopirinahuë', inariso co'huara sontaro'sa huë'shátërasoihuë' nani po'orin. Napoaton itapon:

—Tëhuënhachin mini cato ya'pi ni'quirinaco. Napoaponahuë', intohuaranso huë'piso co nitotërahuë'.

⁵Nani yatashirapaso' pa'pi. Naporo oraquë, ninano ya'coananta oncotapi. Intohuasona pa'piso', co nitotërahuë'.

Napoaponahuë', a'naroáchin imapatama', icantarama', itërin. ⁶Pëinën aipi^a ananpërahuaton po'oaponahuë', naporin. Rino^b tonporo'sa a'huintacaso marë' acorinso huáncana po'orin.

⁷Nacapa naporinso natanahuatona', copirno sontaronënpitaso a'naroáchin imapi. Inapita pipihuachinara, ninano ya'coana oncotaantapi. Sontaro'saso' Cortanii' ira pa'topi. Ina pa'tatona', pëntoinano'saquë huarë' imapi.

⁸Nëhuëtona'piro'sa co'huara huë'ëshátërasoihuë', Nacapariso' nanpëontarahuaton itapon:

⁹—Tëhuënhachin Sinioro ya'ipi iso no'pa' canpita quëtaponquëma'. Ina nohuanton quiyaso pa'pi të'huatërainquëma'. Ya'ipi isëquë ya'huëraiso', naporai. ¹⁰Canpita Iquipito quëran

^a 2.6 Pëinën aipi topachina: Co canpoa pëi pochin yonquicaso ya'huërinhuë'. Siminto quëran a'canpiso pochin inahuaso a'canpi. ^b 2.6 Rino: Itopi quëran pi'shi ocoiatona në'mëtë nipi.

pipihuatamara, Yosëri Quëhuai marë ayanirin. Pëntonamaso marë' napotërin. Naporahuaton cato amoro copirno-ro'sa ata'huantërama'. Piyapinënapitarë chachin napotërama'. Inapitaso' Cortanii' aquëtëran ya'huëpirinahuë', napotërama'. ¹¹Inapita nitotatoi, pa'pi të'huatërainquëma huachi. Napoaton co incoi tëranta nanitërainhuë', chinita'huainquëmaso'. Canpita Siniro imaramasoso', Yosë chachin. Inápaquë hua'anëntërinso pochachin isoro'paquënta hua'anëntërin. ¹²Napoaton Yoscoarë' ta'toma', quëmopinëhuëpitaro'co chachin nicha'ëco. Carinquëma nosororinquëmaso pochachin canpitanata nosoroco. Naporahuaton no'tëquën nontëramacoso' nitota'huaso marë' ma'sha tëranta quëtoco. ¹³Ama tatahuë, mamahuë, inapita tëpatocosohuë'. Yo'yohuëpita, caihuëpita, inapitanata nosoroco'. Ya'ipi ma'shanënanta ama ata'huantocosohuë', itërin. ¹⁴Napotohuachina a'nari itapon:

—Inso Israiro quëmapi tëranta', ma'sha onpotohuachinquëma', Siniro chachin catocoi tëpa'incoi. Quëmahuë nipon, quëmopinënpitahuë nipon, ma'sha onpotohuachinëinquëma', inapochincoi. Co'so' anoyatërëhuaso sha'huihuatanhuë', inapotarainquën. Siniro iso no'pa' quëtohuachincoi, quiyarinta no'tën chachin nosoroarainquëma', itërin.

¹⁵Ninano pairanëinquë chachin Nacapasos', pëninë paquërin. Ina ni'ton, huintananëntaquëchin noninquë cato chachin chinohuararin. Ama insoari tëranta quënanacaso marëhuë' naporin. ¹⁶⁻¹⁷Co'huara chinohuarayátërasohuë', pënënin:

—Motopiro'sa parti paatoma cara tahuëri na'pico'. Ama sontaro'sa quënanainëmaso marëhuë' inapoco'. Nani inapita huënantahuachina', naporo huarë' ya'huëaramaquë paco', itërin. Napotohuachina inapitari itapona':

—Yoscoarë' catahuanquëma itëranquënso', no'tëquën natëarai. ¹⁸Napoa-ponahuë', quëmanta iso huintanaquë quëhuan nonin a'sonamaso ya'huërin. Iso no'pa' maca'huaiso marë' ya'ipicoi huëntahuatoi, nonin a'sonan quëran pëninë nohuitapi. Nani canquihuatoi isëquësáchin niyontonco'. Tataparín, mamaparín, yo'yoparín-pita, caiparín-pita, inapita isëquësáchin ninachina'. Ya'ipi inahua quëmopinënpitanata niyontoina'. ¹⁹Insosona aipiran pa'sápachin tëpaarai. Inaora tëhuënnëquë chiminapon. Co quiya tëhuëaraihuë'. Napoa-ponahuë', insoari tëranta iso pëianaquë ya'huëarínso ma'sha onpotohuachin, na'intaríncoi. Quiya catocoi na'intaríncoi. ²⁰Inaso nipirínhuë', Yoscoarë' ta'tëhua anoyatërëhuaso sha'huihuatan, co huachi quiyanta sha'huitëranquënso' nisaraihuë', itopi. ²¹Napotohuachina Nacapasos' tapon:

—Noyapa'. Inapoa'ahua nipachin, ténin. Napotahuaton huintananën quëran chinohuarahuachina pa'pi huachi. Nani pa'pachinara quëhuan nonin huintananëinquë a'sonin. Aipiran quëran a'sonin. ²²Cato ya'piso motopiro'sa parti pa'pi. Inaquë cara tahuëri na'pipo. Sontaro'sariso' yonisápirinahuë', co quënanpíhuë'. Napohuachina huënantapi. ²³Naporo' inahuaso', motopi quëran o'mantapi. Cortanii' pëntontahuatona', Cosoi ya'huëarínquë panantapi. Nani camahuachinara ya'ipi napopiso' Cosoi sha'huitopi:

²⁴—Nani huachi Siniorori ya'ipi ina no'paquë ya'huëpisopita a'payanin. Napoaton co oshatarihuahuë', inapita minsëcaso', itopi.

Cortanii' pëntontopiso'

3 ¹Tahuërirínquë tashíramiachin Cosoiso' Sitin quëran pipirin. Ya'ipi israiro'sarë chachin pipirin. Pa'sápatona', Cortaniiquë canconpi.

Canconahuatona', në'mëtë pëinëna ótéantapi. Sinioro camaitërinso nina-caiso marë' inaquë ya'huërapí. ²Cara tahuëri quëran Israiro hua'ano'saso', ya'huëapiso pa'topi. ³Papona pochín israiro'sa iso pochín camaipi: "Nihui huënton corto hua'ano'sari, Yosërë'-quënpoa anoyatërëhuaso caposonën quëparapi ni'sarama'. Quëparahuachina', canpitarinta imaco'. ⁴Ina imapatama', insëchinsona pacamaso nitotarama'. Co inquëma tëranta iso ira pa'to-chinamahuë' ni'ton, ina imacamaso ya'huërin. Ama napoaponahuë', Yosë caposonën co'chachin ya'caricosohuë'. A'na quiromitro pochín aquërinso piquëran imaco'," itopi.

⁵Ina quëran Cosoirinta itapon: "Iporaso' Sinioro camaitërinso' nica-toma nitapaco'. Tashiraya inaso', catahuainpoaso marë' chini chiníquën nanantërinso a'notarinpoa'," itërin. ⁶Tahuëririnquë corto hua'ano'santa', itapon: "Yosërë'quënpoa anoyatërëhuaso caposonën pitënama quëran quëpaco'. Quëchitahuatoma ina pitënama quëran Cortanii' pëntontoco'," itërin. Napoto-huachina corto hua'ano'saso', Cosoi camaitërinso chachin nipi.

⁷Naporo' Siniorori Cosoi itapon: "Ipora tahuëri quëran huarë' na'con na'con catahuanquën. Napoaton, noya nicatënën israiro'sa natëponën. Inapohuato, inahuaso nitotapi huachi: 'Moisësë catahuaninso pochachin Siniorori Cosoi ya'huëre' catahuanin,' tosapi. ⁸Quëmariso nipirinhüë', corto hua'ano'sa camaiquë': 'Siniororë'quënpoa anoyatërëhuaso caposonën, pitënama quëran Cortaniiquë canconpatama', yonsansha huanico', itëquë'," itërin.

⁹Siniorori napotohuachina Cosoiso' israiro'sa itapon: "Huëco', Sinioro catahuainpoaso marë' sha'huirinsol' natanco'. ¹⁰Yosëso nanpiárin. Ipora napoarin quëran catahuaninpoaso anitotarinpoa'. Canpitaso ahuëta marë' pa'namaquë, inimicoro'sa minsëra'piapoma'. Yosë catahuaninquëma ni'ton, napotarama'. Canano'sa' ata'huantarama'. Itiro'sa', iporo'sa', huirisëro'sa', quiriquireo'sa', amororo'sa', quiposoro'sa', inapitanta napotarama'. ¹¹Ni'co'. Corto hua'ano'saton, Siniororë'quënpoa anoyatërëhuaso caposonën, pitënpi quëran Cortanii' ya'contapi. Sinioronënpoaso' ya'ipi isoro'paquë ya'huërinso'pita hua'anëntërin. ¹²Iporaso' shonca cato ya'pi huayonco'. Nani huënton quëran a'naya a'naya huayonco'. Israiro'sanpoaso' shonca cato huëntonpoa ni'ton, ina nápo huayonco'. ¹³Corto hua'ano'sa Sinioro caposonën, pitënpi quëran nohuaraitapi. Inaso Sinioro, ya'ipiro'pa' hua'anëntërin. Ipora nohuaraitasoi chachin, Cortaniiiso yanisarin huachi. Inapoaton pëtëtëran i'sha o'marinso', i' pa'copitopiquë sanoirinso pochín nicapon," itërin.

¹⁴⁻¹⁵(Naporo tahuëri'sa sha'topiso' macacaiso tahuëri'sa nisarin. Napoaton Cortanii' paquitarin^c.) Cosoiri napotohuachina israiro'saso', ya'huëapi quëran pipipi. Pipirahuatona corto hua'ano'sa imapi. Inapitaso' Siniororë' anoyatopiso caposonën, pitënpi quëran i'naitomapi. I'naitasoi chachin pëtëtëran i'sha o'marinso', i' pa'copitopiquë chinirinso pochín ninin. ¹⁶Co ina'huaya naporinhüë'. Atamo ninanoquë naporin. Inaso ninano', Sarëtan itopiso ya'cari ya'huërin. Sarëtan^so', sontaro'sa

^c 3.14-15 *Paquitarin topachina*: Co canpoa parti pochín nininhüë'. Motopi parti ni'ton, sha'topiso' co manta onpotërinhuë'.

noyá niacorapipiquë. Pë'natëran i' pa'marinsoso nipirinhüë, Chimirii' marë'pa' nitiquimarin. Ina pochin Siniorori Cortanii' patomairin. Inapohuachina israiro'saso', Quirico ninano notënanquë pëntonpi huachi. ¹⁷Corto hua'ano'saso', Siniororë' anoyatopiso caposonën pitënpi quëran huanirápi. Cortanii' huinquintërinso huáncana huanisoi', ya'ipi a'napita israiro'saso', no'pa' pa'tatona pëntonpi.

**Shonca cato na'piro'sa
Cortaniiquë mapiso'**

4 ¹Ya'ipi israiro'sa pëtonpachinara, Siniorori Cosoi itapon: "Shonca cato Israiro quëmapi'sa huayonquë'. Nani huënton quëran a'naya a'naya huayonquë'. ²⁻³Nani huayonpatan, na'piro'sa ocoicaiso camaiquë'. Cortanii' yanirinquë masahuatona', shonca cato ocoi'ina'. Corto hua'ano'sa huaniapitaquëran ocoi'ina'. Ocoirahuatona', ipora tashi chinotaramaquë quëpa'ina'," itërin.

⁴Napotohuachina, Cosoiso shonca cato quëmapi'sa huayoninso përarin. ⁵Huë'pachinara itapon: "Cortanii' yanirinquë huancanaquë huarë', paco'. Sinioronënpoa caposonën notënanquë a'naya a'nayama a'nara na'pi maco'. Israiro'sanpoaso', shonca cato huënton ninëhua'. Napoaton, a'naya a'naya mapatama', shonca cato ya'ipiya quëran naniarin. ⁶⁻⁷Catahuainpoaso marë' Sinioroso' Cortanii' patomairin. Chini chiníquën nanantaton naporin. Ina ayonquínpoaso marë', iso na'piro'sa imoarëhua'. A'na tahuëri hui'nampita natanarinquëma': '¿Ma'ta tapoma iso na'piro'sa imorama!?' itaponënuquëma'. Napotohuachinënuquëma': 'Yosë yonquia'huaiso marë' imorai. Iráca corto hua'ano'sari, Sinioro caposonën pitënpi quëran Cortanii' pëntoncaiso

marë' i'naitomapi. I'naitaso chachin i' nipatomairin. Inaporin ni'ton, no'pa' pa'tatoi pëntonai,' itarama'," itërin.

⁸Napotohuachina, inahuaso Cosoiri camairinso chachin nipi. Pa'sahuatona', na'piro'sa Cortanii' yanirinquë mapi. Israiro'saso' shonca cato huënton ni'ton, shonca cato mapi. A'naya a'naya huënton marë' a'nara na'pi mapi. Masahuatona', chinotai marë' në'mëtë pëinëna ótënpiquë imopi. Siniorori Cosoi camairinso chachin nipi. ⁹Napora huaton Cosoiso', shonca cato na'pi chachin maantaran. Ina na'piro'saso', corto hua'ano'sa Siniororë' anoyatopiso caposonën pitënpi quëran huanipitaquëchin, a'mitë a'mitëtërin. Ina na'piro'saso', iso quirica ninshitasoco huarënta', inaquëranchin ya'huapi.

¹⁰Siniorori Cosoi quëran israiro'sa camairin. Ya'ipi camaitërinso nicasoi corto hua'ano'saso', Cortanii' yanirins huáncana huanirápi. Siniororë' anoyatopiso caposonën, pitënpi quëran huanirápi. Moisésënta ina pochin Cosoi camairin ni'ton, inapochin nipi. Manorahuatona', Cortanii' yanirins pëntonpi. ¹¹Naní quëran pëtonpachinara, corto hua'ano'santa pëntonpi huachi. Siniororë' anoyatopiso caposonën, pitënpi quëran pëntonpi. Nani pëtonahuatona naquëranchin quëchitaantapi. ¹²Nopino, Cato, inapita Israiro huëntono'santa' pëntonpi. Manasisi patoma huënton israiro'santa', napopi. Moisésëri camairinso chachin noyá niacorahuatona pëntonpi. Inahua'ton quëchitapi. ¹³Catapini shonca huaranca israiro'sa ahuëtai marë' noyá niacopi. Inaporahuatona', Sinioro caposonën notënanquë na'huëpi. Pa'sahuatona', Quirico canonamatë parti notëtapi. ¹⁴Naporo tahuëri ya'ipi israiro'sa ni'tonënuquë, Siniorori Cortanii' ayanirin.

Ina nicatona Cosoi pa'yatopi. Chimi-naquë huarë' pa'yatatona!, t'ë'huatapona huachi. Moisésë napotopiso pochachin, Cosointa nitapi.

¹⁵Naporo' Siniotori Cosoi camairin: ¹⁶“Corto hua'ano'sa canpitaro'co anoyatërahuëso' caposonën pitënpi quëran Cortanii' yanirinso huáncana huanipiso!, camaiquë pipiina!” itërin.

¹⁷Napotohuachina, Cosoiso' pipicaiso marë' camaitërin. ¹⁸Corto hua'ano'sa pipihuachinara, naquëranchin Cortaniiso!, inachachin niantarin. Co'huara yaniyátëraponhuë' paquii'tërinso pochachin niantarin.

¹⁹Pascoa^d yoquiquë shonca tahuë-ritapaso!, israiro'sa Cortanii' yanirin quëran pëntonpi. Pëntonahuatona Quiricaro itopiquë chinotai marë' në'mëtë pëinëna ótéantapi. Quiricaro' Quirico quëran, pi'i pipirinsó parti quëparitërin. ²⁰Inaquë Cosoi na'piro'sa Cortanii' quëran ocoipiso!, a'mitë a'mitëtërin. Shonca cato chachin napotërin. ²¹Naporahuatón israiro'sa itapon: “A'na tahuëri hui'namapita natanaponquëma!: ‘¿Ma'ta tapoma isopita na'piro'sa a'mitë a'mitëtërama!?’ itaponënuquëma!.” ²²⁻²³Napotohuachinënuquëma!: ‘Yosë yonquia'huaiso marë' a'mitë a'mitëtërai. Iráca Sinioro caposonën, corto hua'ano'sari pitënpi quëran Cortanii' pëntontacaiso marë' i'naitomapi. I'naitasoi chachin Sinioro nohuanton i' nipatomairin. Inaporin ni'ton, no'pa' pa'tatoi pëntonai. Iráca chachionta pëntona'huaiso marë' Quëhuai' marë patomairin. Inapotasó, no'pa' pa'tatoi pëntonai. Inapochachin Cortaniinta nitërin,’ itarama!.” ²⁴Ina pochin sha'huíhuatama!, ya'ipi

isoro'paquë nisha nisha piyapi nipisopita Sinioro chini chiníquën nanantërinso nitotapona!. Naporahuatón canpitanta!, ‘Siniorosó Yosënënpoa ni'ton, noya nicatëhua natërápaso ya'huëchinpoa!,' tosarama!,” itërin Cosoiri.

**Quiricaroquë marca
niacotopiso'**

5 ¹Cortanii' quëran pi'i ya'coninsó parti no'paquë, nisha nisha copir-noro'sa ya'huëpi. Amoro copirnoros'a!, Canaan copirnoros'a!, inapita ya'huëpi. Amorosos'a!, Cortanii' yonsan parti ya'huëpi. Cananos'santa!, marë Pancai' parti ya'huëpi. Ya'ipi inapita natan-topi: “Siniotori Cortanii' ayanirin. Inapotasó, israiro'santa pëntontopi,” topi. Ina natantatona!, na'con na'con pa'yanpi. Napoaton co nanitopihuë' israiro'sa chinitacaiso!.

²Naporo tahuëri'sa Siniotori Cosoi itapon: “Na'pi quëran cosoroa'huaro'sa niquë!. Inaquë israiro'sa marca acotëquë!,” itërin. ³Napotohuachina cosoroa'huaro'sa nisahuaton Israiro quëmapi'sa marca acotërin. Araroti^e motopi itopiquë napotërin. ⁴⁻⁶Iráca Iquipitoquë ya'huëasoí chachin israiro'sa marca acotopi. Mashoros'a!, hua'huaro'sa!, ya'ipi acotopi. Catapini shonca pi'i inotëro parti pa'tasoí hua'huatopisopitasó!, co acotopihuë!. Iquipito quëran mashoro'sa pipipisopitasó! co Sinioro natëpihuë!. Napoaton inari sha'huitërin: “Shimashonëmapita iráca sha'huitërahuë: ‘Caso Sinioroco ni'to, no'tëquën sha'huitaranquëma!. A'na tahuëri shiparimapita iso no'pa' co manta pahuaninsóhuë' quëtarahuë,' itërahuë. Napotopirahuë, canpitaso co

^d4.19 *Pascoa pitaso!*: Ya'natiirinsó yoquiquë israiro'sa marë' ninin. ^e5.3 *Araroti Iprío nananquëso!*: Quëmapi'sa taparonën sha'huëchin yashitëtopiquë, tapon napopi.

natëramacohuë'. Napoaton caso Sinioro ni'to, no'tëquën sha'huitaranquëma'. Canpitaso co inaquë ya'conaramahuë', itërin. Napotërinso chachin, inapitaso inotëro parti taquipi. Inapoatona ipora Cortanii' pëntontopisopitaso' na'con na'con co marcahuanyántërapihuë'. ⁷Napoaton Cosoi camaitërin inapita marca acotacaso!. Co natëtatonaraihuë' taquipisopita hui'nina!, acotapi. Inapitaso' pa'pina ya'huërënamën Siniorori Canaan no'paquë po'moarin. Inotëro parti pa'sápatona co acotopihuë ni'ton, inapotapi huachi. ⁸Nani ya'ipi acotahuachinara, noyatai huarë' inaranchin chinotopi. ⁹Naporo' Siniorori Cosoi itapon: Iquipitoro'sa marë' israiro'sa sacatona!, taparo nisápirinahuë', cari inquitërahuë huachi. Iporaso' marcahuanatona!, co huachi taparo nipihuë'. Napoaton ina ro'tëso!, Quiricaró, itopi.

¹⁰Israiro'saso' inaquëranchin ya'huëaso!, pascoa pita na'huëpi. Cata-pini tahuëri pochin inaquë ya'huëaso!, i'huanahuanquë nspiratapi. Quiricaro'so!, Quirico ninano canonamatëquë ya'huërin. ¹¹Naporo tahuëri chachin pan co ahuëpocatopinanhue' ca'pi. Triconata iyanapinan ca'pi. Tahuëririnquëso nipurinhuë', Canaan no'paquë sha'topiso' nitërinso' ca'pi huachi. ¹²Naporo quëran huarë' mana copi ténin huachi. Napoaton israiro'saso', co huachi onporo tëranta ina ca'pihuë'. Naporo pi'i quëran huarë', Canaan no'paquë sha'topiso' nitërinso' ca'pi.

Sinioro sontaronënpita hua'anën quënaninso'

¹³A'na tahuëri Cosoiso!, Quirico ninano ya'cari nisarin. Inaquë ni'so' a'nanaya a'nara quëmapi ni'nin. Sahuëninën sël'quërin quëran ina notënan quëran huaniárin. Ya'carirahuaton Cosoiri

natanin: ¿Inta quëma catahuanan? israiro'saco catahuanancoi: ¿Inimiconëhuëipita nica? itërin. ¹⁴Napotohuachina, inariso itapon:

—Co canpita catahuananquëmahuë'. Co inimiconëma tëranta catahuanahuë'. Sinioro sontaronënpita hua'anëncó nicato o'marahuë, itërin. Ina natanaton, Cosoiso isonin quëran no'paquë huarë' monshorin. Monshorinquëranchin nataantarin:

—Caso quëma piyapinën pochinco ninahuë. ¿Ma'ta Sinioro nohuantëran nica'huaso!? itërin. ¹⁵Napotohuachina, inariso itapon: ¿Isëquë ya'notëranquën ni'ton, sapatën ocoirahuaton chinotoco! itërin. Ina natanaton, Cosoiso inaquë chinotërin.

Quirico ninano ahuëcaiso marë' Siniorori anitotërinso'

6 ¹Quiricoro'saso', ninano ya'coanaro'sa noyá oncotopi. Ama israiro'sari ya'contatona ahuëcaiso marëhuë' napopi. Napoaton co insonta pipirinhuë', co insonta ya'coninhuë'. ²Napoaponahuë', Siniorori Cosoi itapon: “Quirico ninano ata'huantacaso marë' carinquë catahuananquën. Copirnonëna!, sontaronënpita, inapita minsëarama. ³Quëmaso' sontaronënpitarë'quën chachin ninano tahuitëquë!. Nani tahuëri a'narora' tahuitoco!. Inapochináchin saota tahuëri naniin. ⁴Iso pochin pa'sarama!: Canchisë corto hua'ano'sa quëchinamën pa'sapi. Carniro pomon sël'quërahuatona pa'sapi. Ina piquëran canpitarë'co anoyatërhüaso caposonën quëparapi. Corto hua'ano'sari pitënpí quëran quëparapi. Ina piquëran Israiro sontaro'santa pa'sapi. Canchisë tahuëri nanihuachinaso!, canchisëro tahuitarama!. Corto hua'ano'sa paponá pochin carniro pomon pihuisoi tahuitarama!.

⁵Canchisëro' tahuitëramaso nanisëma chachin, pomono'sa nisha pihuirapi huachi. Naporo canpitaso', chiníquën 'yai,' toco'. Naporo chachin ninano pairanën nohuatapon. Nohuatohuachina, notëtërama quëran chachin ninano ya'contatoma ahuëco'," itërin.

⁶Napotohuachina Cosoiso' corto hua'ano'sa përarin. Huë'pachinara itapon: "Canchisë ya'pima carniro pomon sëlquëramaquëran quëchitoco'. Ina piquëran a'napitanquëmanta', Siniororë'quënpoa anoyatërhüaso caposonën quëpaco'," itërin. ⁷Israiro sontaro'santa Cosoiri itapon: "Paatoma ninano tahuitoco'. Ahuëtai marë' noyá niacoatona quëchitopisopita'ton, quëchichina'. Ina piquëran carniro pomon quëpapisopita pa'ina'. Ina piquëran Sinioro caposonën quëpapisopitanta imachina'," itërin. ⁸⁻⁹Israiro'saso', Cosoi camaitërinso chachin ya'lipiya quëran nisapi. Ahuëtai marë' noyá niacoatona quëchitopisopita'ton, quëchitapona'. Ina piquëran carniro pomon quëpapisopita pomontëre'nachin papona'. Sinioro caposonën quëpapisopitanta', imatapona'. Piquëran huarë' a'napita Israiro sontaro'santa papona'. ¹⁰Co'huara Israiro sontaro'sa ninano tahuichátërasoihuë', Cosoiri nani camairin: "Ta'tatoma canpitaso paco'. Cariima camaia'huanquëma huarë' chiníquën 'jyai!' tarama'," itërin.

Quirico ninano ata'huantopiso'

¹¹Cosoi camaitohuachina, Corto hua'ano'saso Sinioro caposonën pitëmpi quëran, a'narora' ninano tahuitopi. Nani tahuitahuatona', naquëranchin ya'huëapiquë paantapi. Tashi nipachina huë'ëcaiso marë' inaquë paantapi. ¹²Tahuëririnquë tashíramiachin Cosoiso' capayataantarín.

Ya'ipi israiro'santa capayatopi. Corto hua'ano'santa', Sinioro caposonën maantarahuatona pitëantapi. ¹³Ahuëtai marë' noyá niacoatona quëchitopisopita, quëchitopi. Ina piquëran carniro pomon quëpapisopita pomontëre'nachin pa'antapi. Ina piquëran Sinioro caposonën quëpapisopitanta pa'sapi. Piquëran huarë' a'napita Israiro sontaro'santa pa'sapi. ¹⁴Naporonta a'narora' ninano tahuitaantapi. Inarë nani catoro tahuitapi. Nani tahuitahuatona', naquëranchin ya'huëapiquë paantapi. Saota tahuëri inapósapi.

¹⁵Canchisë tahuëri nanihuachina, tashiyachin huënsëintapi. Nani tahuëri napopiso chachin naquëranchin ninano tahuitaantapi. Ina tahuëriso napoaponahuë', canchisëro' tahuitopi. ¹⁶⁻²⁰Canchisëro' tahuitopiso nanisoi chachin, corto hua'ano'sa pomontaantapi. Pomontasoi', Cosoiso' sontaro'sa camairin: "Iso ninanoquë ya'huëpisopita, ma'shanënapitarë chachin ata'huantomiatamaso ya'huërin. Pëiro'santa ohuatamaso ya'huërin. Sinioro ina pochin camaitërin ni'ton, inapotamaso ya'huërin. Monshihuantë sanapi Nacapa itopisoso', nosoroco'. Ina nisahuaton pëinënquë ya'huëapisopitanta', nosoroco'. Inari nëhuëtona'piro'sa a'parahuëso po'orin ni'ton, nosoroco'. Ni'cona ina ninanoquë ma'sha ya'huërinso', canpitaora marë' matama'. Nani inaso Sinioro camairinquëma', ata'huantamaso'. Co ina natëtomarahuë' mapatamaso', ya'lipinpoa ama huachi noya ya'huëcaso marëhuë' sha'huitatonpoa ana'intarinpoa'. Oro, prata, inapitaso nipirinhüë', macatëhua Sinioro marë' pa'ton nipisopita tapapiquë, acoarihua'. Sha'pi hua'na, hua'namia inaquëranpita ma'sha nipisonta macatëhua', inapotarihua'," tënin. Camaitërinso

toquitohuachina corto hua'ano'saso', pihuiamiatopi huachi. Naporo' Cosoiso': "Yai toco huachi," ténin. Ina natana-tona', Israiro sontaro'saso' chiniquéen: "¡Yaiiii!" topi. Napohuachinara, ninano pairanén inápa nipirinhué' nohuatérin. Naporo' israiro'saso', notétopi quéran chachin ninano ya'contatona ahuépi.

²¹Sahuéni quéran ahuérahuatona quémapi'sa', sanapi'sa', hui'napi'sa', mashoyaro'sa', inapita tēpapi. Tororo'sa', ohuicaros'a', moraro'sa', inapitanta tēpapi. Ya'ipi ata'huantopi. Nacapa, quémopinēnpita, inapitaíchín cha'ēpi.

²²Cato nēhuétona'piro'sa i'hua a'parinsopita, Cosoiri itantapon: "Monshihuanté sanapi pēinēnquē pa'sahuatoma', ocoicontaco'. Ya'ipi quémopinēnpitaré chachin ocoico'. Yoscoaré' ta'toma sha'huitēramaso chachin nitonco'," itérin.

²³Napotohuachina, inapitasa pa'sahuatona ocoiconpi. Pa'pin, a'shin, yo'inpita, cainpita, inapitanta ocoiconpi. A'napita áquē quémopinēnpitanta ocoiconpi. Ya'ipi inapita ocoirahuatona', ya'huéapi aquécha acoonpi. Ama ma'sha onpotacaiso maréhué' inaqué acopi. ²⁴Ina quéran israiro'saso', ninanoquē oro, prata, inapita mapi. Sha'pi hua'na, hua'namia, inapita quéran ma'sha nipsisopitanta mapi. Inapita macatona Sinioro maré' pa'ton nipsisopita tapapiqué acopi. Nani inapita mapachinara, ninanoquē pēiro'sa ya'huérinso ya'ipi ahuiquitopi. ²⁵Nacapa, quémopinēnpita, inapitasa nipirinhué', co Cosoiri atēpatérinhué'. Quirico ninano nēhuécaiso maré' a'parinsopita catahuarinso maré' co atēpatérinhué'. Naporo quéran huaré' Nacapa quéran pipisopitaso', israiro'sa yacapapi huachi. ²⁶Ina quéran Cosoiso', iso pochin sha'huirin: "Inso tēranta Quirico ninano anoyataantahuachin, Siniorori chachin ama huachi

noya ya'huécaso maréhué' sha'huitatón ana'inchin. Simintonén acoaso', hui'nin paninatérinso' chimiin. Ninano pairapipiso' ya'coanaro'santa acoaso', hui'nin huinsho nininso' ya'huéré' chimianta'in. Yoscoaré' inapoarin," ténin. ²⁷Sha'huitérinso chachin Siniorori Cosoi catahuarin. Napoaton ya'ipi ina parti ya'huépisopita, Cosoi chiniquéen nanantérinso' natantopi.

Amororo'sa canapiso'

10 (Cosoiso' israiro'saré chachin Quirico ninano ata'huantopi. Ina piquéran Ai ninano ya'huéré' yaata'huantopirinahué', co nanitopihué'. Ina quéran Cosoiso' hua'ano'sapitaré chachin Yosé nontohuachinara, a'nara Israiro quémapi oshahuaninso' Yoséri anitotérin. Inaso', ahuétaapon pochin ma'sha maninso' inaora maré' po'orin. Inari na'intérin ni'ton, co huachi israiro'sa canatopihué'. Napohuachina tēhuéna'piso', sa'in, hui'ninpitare chachin tēpapi. Ma'shanēnpitanta', ya'ipi ata'huantopi. Naporo huaré' Yoséri israiro'sa noya niantaton, Ai ninanoquē ya'huépisopita ata'huantacaiso maré' catahuaantarín.) ¹Cosoiso' israiro'saré chachin Quirico ata'huantopi. Ina piquéran Ai ninano ya'huéré', inapotaantapi. Capaon ninanoquē ya'huépisopitaso', ina natantopi. Ina natantatona', ama israiro'saré' niahuécaiso maréhué', anoyatopi. Anoyatopi ni'ton, inapitaré' ya'huépi. Ina ya'cari a'nanta ninano ya'huérin. Quirosarin itopiso. Copirnonénso', Atonisi itopi. Inaso piyapinēnpitaré chachin israiro'sa canatériapiso natantatona', pa'pi pa'yanpi. Pa'yanatona': ²"Capaonso', panca ninano'. Ai ninano quéran panca panca. Naporahuatón noya noya ninin. Copirnoros'a ninano hua'anéntopiso

pochin niconin. Piyapinēnpitanta noyá nitotopi ahuētacaiso niponaraihuē' napopi," topi. ³⁻⁵Catapini Amoro copirnoros'a ina ya'cariya ya'huēpi. A'naso', Oamo itopi. Inaso' copirno, Iporon ninanoquē hua'anēntērin. A'nanta', Piran itopi. Inaso', Carmoto ninano itopiquē hua'anēntērin. A'nanta', Cahuia itopi. Inaso', Naquisi ninano itopiquē hua'anēntērin. A'nanta', Tipiri itopi. Inaso', Icoron ninano itopiquē hua'anēntērin. Inapita copirnoros'a Atonisiri piyapinēnpita quēran nanan a'patērin: "Copirnonēhuēi naporin: 'Capaon ninanoquē ya'huēpisopita Cosoi, israiro'sa, inapitarē' nani anoyatopi. Ama niahuēcaiso marēhuē' inapopi. Napoaton huēco pa'ahua Capaonos'a ahuēca'huaiso catahuaco,' tēnin," itopi. Napotohuachinara, nohuantopi. Inapoatona a'natērāpo Amoro copirnoros'a sontaronēnapitarē chachin Capaon paapapi. Inaquē ya'huēpisopita ahuēcaiso marē' pa'pi.

⁶Ina nicatona Capaonquē ya'huēpisopitaso', Cosoi sha'huitacaiso marē' a'nara a'papi. Quiricarquē nincantahuaton sha'huitonin: "Ya'ipi amoro copirnoros'a motopiro'sa parti ya'huēpiso', nihuēntonpi. Nihuēntonahuatona ahuēinacoiso marē' o'mapi. Nani anoyatērēhua piyapinēma nica'huaiso' nichinapon chachin nosorocoi. Nosoroatoncoi sontaronēnpitarē'quēn chachin huēquē manóton inapita quēran pa'poyaco," itērin. ⁷Napotohuachinara, Cosoiso ya'ipi sontaronēnpita ayontonin. A'naquēn sontaro'saso', noya noya ahuētopi. Inapitanta Quiricarquē ayontonin. ⁸Co'huara Capaonquē pa'shátērasoihuē', Siniorori Cosoi itapon: "Ama amororo'sa tē'huatēquēsohuē'. Carinquēn catahuanquēn ya'ipi inapita minsēamaso'," itērin.

⁹Siniorori sha'huitohuachina, Cosoiso' ya'ipi sontaronēnpitarē chachin Quiricar quēran pa'pi. Tashi pantarāpatona', amororo'sa co yonquiasoihuē' ahuēcontapi. ¹⁰Sinioro nohuanton amororo'sa pa'pi pa'yanpi. Inapohuachinara, Cosoiso' sontaronēnpitarē chachin, notohuaro' amororo'sa tēpapi. Capaon ninano tancapitapirinahuē', inapotopi. A'naquēn amororo'saso ta'apirinahuē', israiro'sari imapi. Piti-oron ninanoquē ira pa'ninso parti imapi. A'naquēonta Asica ninano', Maquita ninano', inapita ninanoro'sa ya'huērinso parti huarē' ta'api. Napopirinahuē' israiro'sari imatona notohuaro' tēpapi. ¹¹Piti-oron ninano ya'cari', a'na nicotoana ya'huērin. Inataquēchin a'naquēn amororo'saso', israiro'sa tē'huatatona pa'mapi. Ina pa'tomasoi, Siniorori chachin inápa quēran notohuaro' panca na'piros'a a'patiimarin. Ocai pochin a'patiimarin. Ina na'piros'sari notohuaro' tiquirin. Israiro'sari sahuēniquē tēpapi quēran na'con na'con tiquirin.

¹²Sinioro nohuanton israiro'sari amororo'sa canapi. Naporo tahuēri chachin Cosoi Yosē nontērin. Sontaronēnpita natantonēnquē Sinioro nontaton, tapon:

"Pi'i, Capaon ninanoquē tachtēquē'.

Quēmanta yoqui, Acaron motopianaquē tachtitēquē'," itērin.

¹³Napotohuachina: Pi'i, yoqui, inapitanta tachtitopi.

Israiro'sari inimiconēnpita minsēai huarē' tachtitopi.

Ina chachin noya nina'pi itopisonta quiricaquē ninshitērinso naporin. Naporo pi'i, camotēchin nisarin. Nisaponahuē', a'na tahuērira pochin tachtitaton, co huachi manorinhuē' ya'conacaso'. ¹⁴Iráca quēran huarē' co ina pochin tahuēri

ya'huëchininhuë'. Ina piquëraonta co huachi ina pochin tahuëri ya'huëantarinhüë'. Naporoíchin Siniro a'na piyapiri nontërinso', po'pin a'panirin. Siniro chachin israiro'sa catahuaton ahuëtarin ni'ton, naporin. ¹⁵Ina quëran Cosoiso', israiro'sarë chachin Quirica-roquë pa'mantapi.

**Cosoi yachiminaton
israiro'sa nontërinso'**

24 ¹⁻²Siquimo ninanoquë Cosoi ya'ipi Israiro huëntono'sa ayontonin. Ansianoro'sa', hua'ano'sa', coisëro'sa', sontaro hua'ano'sa', inapita ayontonin. Siniro chinotacaso marë' në'mëtë pëi ótënpiso' notënanquë ayontonaton itapon:

—Siniro israiro'sanpoa chinotërhüaso naporin: “Íráca shimashonëma Tari itopiso' Iopiratisii' yonsanquë ya'huërin. Hui'ninpitaso': Apraan, Nacoro, inapita. Inaquë ya'huëapona pochin inapitaso', nisha nisha mamasshiro'sa moshapi. ³Apraanso', ina quëran ocoirahuë. Ocoirahuato, ya'ipi iso no'pa' pa'tacaso camairahuë ni'ton, ya'ipi pa'tërin. Ina quëran ca nohuanton chachin shinpita na'amiatërin. Ca nohuanton hui'nahuanpachina Isaco itërin. Ina'ton canpita shimashonëma ninin. ⁴Isaconta ca nohuanton cato hui'nahuanin. Cacopo, Isao, inapita. Isaoso', Sëir motopiro'sa parti no'pa' quëtërahuë. Cacoposo napoaponahuë', hui'ninpitare chachin Iquipitoquë pa'mapi.

⁵Hua'qui quëran shimashonëmapita catahuarahuë. Ina quëran ocoica'hüaso marë' Moisésë, Aaron, inapita a'parahuë. Iquipitoro'sa chiniquën aparisitato, shimashonëmapita ocoirahuë. ⁶Iquipito quëran pipihuachinara, ina copirnosos', sontaronënpitarë chachin

imaquirin. Quëhuai' marëquë huarë' imaquirin. Quira toronaro'saquë, cahuarioro'saquë, inaquëpita imaquipi. ⁷Napotahuachinara, shimashonëmapitaso' catahua'hüaso marë' nontërinaco. Napoaton inapita catahua'hüaso marë' inapita pinëna quëran, pa'pi tashiro acorahuë. Cato huëntono'sari chachin ahuanapanirin. Ca nohuanton chachin marërinta imotohuachina, iquipitoro'sa taquiiitopi. A'naquëma iquipitoro'sa napotërahuëso' ni'nama'.

Ina piquëran canpitaso', hua'qui inotëro parti ya'huërama'. ⁸Napoyan quëran carima amororo'sa ya'huëpique quënanquëma'. Cortanii' aquëtëran ya'huëpisopita'ton chinitërinënuëma'. Chinitopirinënuëmahüë', carima catahuanquëma ni'ton, inapita minsërama'. Inapotahuatoma', ina parti no'pa' ya'huërinso' hua'anëntërama'. ⁹Sipor hui'nin Paraco itopisonta piyapinënpitarë chachin chinitërinënuëma'. Canainënuëmaso marë', inaso Pioro hui'nin Paramo itopiso amatërin: 'Huëcaton, ama huachi noya ya'huëcaiso marëhuë' sha'huitiquë'; itacaso marë' amatërin. ¹⁰Inaso nipirinhüë', co caso nohuantërahuë' inapotinëmaso'. Co inapotatënuëmarahuë' ca nohuanto noya ya'huëcamaso marë' sha'huitërinquëma'. Inapotatënuëma nicha'ëranquëma'. ¹¹Ina quëran canpitaso', Cortanii' pëntontërama'. Pëntontatoma Quirico ninanoquë canconama'. Ina ninanoquëso', nisha nisha piyapi'sa ya'huëpi: Amororo'sa', huirisëro'sa', canano'sa', itiro'sa', quíriquiuro'sa', iporo'sa', quiposoro'sa', inapita ya'huëpi. Inapitaso chinitopirinënuëmahüë', carima catahuanquëma ni'ton, inapita minsërama'. ¹²Cato amoru copirnoros' aquëtëran ya'huëpisonta', co canpitari minsëramahuë'. Co sahuëninëmaquë

minsëramahuë'. Co pë'chinanëmaquë minsëramahuë'. Cari pa'pi a'payanahuë ni'ton, ta'ananpirinquëma'. Co'huara canchâtërasënuquëmahuë', ta'ananpirinquëma'. ¹³Ipora canpitaso co sacaiyâtërahuë', ninanoro'saquë ya'huërama'. A'napita sacai ocoirinquë ya'huërama'. Opa, asitona, inapitanta co canpitari sha'piramahuë', nitërinso' ca'nama'. Ya'ipi iso no'pa', ma'sha ya'huërinsopitarë chachin carima quëtëranquëma',¹⁴ tënin, itërin.

Napotahuaton, taantarin:

¹⁴—Ya'ipi ina sha'huitëranquëmaso' yonquiatoma', Sinioro të'huatoco'. Të'huatatoma no'tëquënáchin natëco'. Iráca shimashonëmapita Iopiratisii' yonsanquë ya'huëapona', nisha nisha mamanshi moshapi. Iquipitoquënta inapopi. Inapita a'porahuatoma Sinioroíchin chinotoco'. ¹⁵Napoaponahuë', co Sinioroíchin yachinotohuatama-huë', ipora tahuëri huayonco insosona yachinotëramaso': ¿Shimashonëmapita Iopiratisii' yonsanquë ya'huëapona', nisha nisha mamanshi moshapiso nica? ¿Amororo'sa mamanshinëna moshapiso' nica? Caso nipirinhüë', quëmopinëhuëpitarë'co chachin Sinioro chinotarai, itërin.

¹⁶Napotohuachina israiro'sari itapona':

—¿Co nohuantëraihuë' nisha nisha mamanshi moshaca'huaiso! Sinioro catahuaincoi ama ina pochin nica-ca'huaiso marëhuë'. ¹⁷Quiyaso', iquipitoro'sa chiniquën asacatonaco aparisitápirinacoihuë', ina quëran ocoirincoi. Shimashonëhuëpitanta ocoirin. A'naquëncoiso', ni'tonëhuëiquë chachin pa'pi huëhuëpiro nininsopita na'aro ninin. Huëcasocointa', nisha nisha piyapi nipisopita ya'huëpique na'huëtiirai. Tahuëri tashirë chachin a'pairincoi. ¹⁸Huë'naitaquëchin nisha

nisha piyapiro'sa ya'huëpirinahuë', inari chachin inapita a'parin. Amororo'sa'ton isëquë ya'huëpirinahuë', a'parin. Napoaton quiyanta Sinioroíchin chinotarai. Inaíchin Yosënhüëi ni'ton, chinotarai, itopi.

¹⁹Napopirinahuë', Cosoiriso itapon:

—Yosëso noyasáchin ninin. Naporahuaton, a'pitatënuquëma', co nisha nisha chinotamaso quëtërinquëmahuë'. Co natantochináchinhuë' cancantatoma oshahuanápatama', co ahuantarinquëmahuë'. ²⁰Ina a'porahuatoma nisha nisha mamanshiro'sa moshahuatama', Sinioronta i'huëretarinquëma'. Na'con catahuapirinquëmahuë', chiniquën ana'intarinquëma', itërin. ²¹Napotohuachina, israiro'saso taantapi:

—Co inapoaraihuë'. Sinioroíchin quiyaso' chinotarai, itopi. ²²Naporo' Cosoi taantarin:

—Sinioroíchin chinotarai tënamaso', canpitaora chachin sha'huirama', itërin.

—Quiyaora chachin mini sha'huirai, topi ya'lipiya quëran. ²³—Ya'ipi mamanshi mosharamasopita nipachin a'poco'. Inapita a'porahuatoma', ya'ipi cancanëma quëran Sinioroíchin tahuëretoco'. Inasáchin israiro'sanpoaso' chinotërehua', itërin Cosoiri.

²⁴—Sinioroso Yosënenpoa ni'ton, inasáchin chinotarai. Naporahuaton ina camaitërinso'ráchin nisarai, topi ya'ipi israiro'sa'.

²⁵⁻²⁶Naporo tahuëri chachin Cosoiso', iráca Yosëre' anoyatopiso', israiro'sa sha'huitaantarin. Siquimo ninanoquë naporin. Sinai motopiquë sha'huitaton, pënëntërinso', camaitërinso', inapita sha'huitërin. Ina quëran ya'ipi inapita Yosë pënëntërinso' quiricaquë ninshito-pisonta sha'huitërin. Nani ya'ipi inapita sha'huitohuachina, insina narasoquë panca na'pi acocaiso camaitërin.

Camaitohuachina, Yosë chinotacaso marë' në'mëtë pëi ótënpiso pirayan acopi. ²⁷Ina quëran ya'ipi israiro'sa sha'huitërin:

—Ni'co'. Iso na'pi masho a'na tahuëri ayonquiarinpoa'. Siniro ipora tahuëri sha'huitërinpoaso natanatëhua a'pani-rëhuaso', ayonquiarinpoa'. “Yoscoarë' inasáchin chinotarai,” ténamasonta' ayonquiarinquëma'. Iso na'pi ni'patama' ina yonquico', itërin. ²⁸Ina piquëran Cosoiso' ya'ipi israiro'sa', ya'huëpique' ya'huëpique' a'paantarín.

Cosoi chiminínso'

²⁹Co hua'quiya quëranhuë' Cosoiso' chiminín. Pasa shonca pi'ipitapaso' chiminín. Inaso', Yosë piyapinën ninín. Sha'huitëranquëmaso chachín Non hui'nín. ³⁰Nani chiminpachina, no'panënuquë pa'pitopi. No'panënso', Tinato-sëra ninanoquë ya'huërin. Inaso ninano', Iprain huënton israiro'sa no'pa' mapiquë ya'huërin. Caasi motopi

itopi quëran, pëtëtë parti quëparitërin. ³¹Israiro'saso', Cosoi chiminaquë huarë' Siniroíchin chinotopi. Ansianoro'sa Siniorori catahuarínso ni'pisopita chiminai huarë', inaíchin chinotopi.

Cosi nansëquën pa'pitopiso'

³²Cosi nansëquën Iquipito quëran quëpisona', Siquimo ninanoquë pa'pitopi. Ina no'paso', Cacopori iráca Siquimo pa'pin Amoro itopiso' hui'ninpita pa'antërin. Pasa coriqui marë' pa'antërin. Ina no'paso' Cosi shinpitanquën quëparitërin.

Iriasaro chiminínso'

³³Ina piquëran Aaron hui'nín Iriasaronta', chiminín. Chiminpachina, quëmopinënpitari hui'nín Huinisë itopiso' no'panënuquë pa'pitopi. Inaquë a'nara motopia'huayaquë pa'pitopi. Inaso' no'pa' Iprain huënton israiro'sa no'pa' mapiquë ya'huërin. Inaquë Cosoiri no'pa' quëtërin ni'ton, inaquë pa'pitopi.